

Però, gîa che te regîa, a contriboî ativamente a-a vitta de l'Asociaçion a l'é 'na vintenn-a de sòcci de longo disponibili a fâ tutto quello che serve: da l'avertua da sede a portâ avanti e inderê o Gonfalon, senza scordase l'inpegno di nònni inte scheue e tutti i eventi (tanti co-a muxica) che A Compagna a l'òrganizza into corso de l'anno e che pontoalmente ne demmo conto chi in sciò Boletin e in sciò scito Internet.

Òua sucede senpre ciù de spesso che A Compagna a vegne invitâ a manifestaçoin organizæ in sciò teritòio zeneize: procescioin, cortei, dibatiti, eventi muxicali, premi e concorsci. Comme sòcci no poemo che esine contenti: veu dî che tante atre realtæ çitadinn-e veddan, inta prezensa da Compagna e do seu Gonfalon, in segno inportante e indiscusso da zeneixità: se gh'é a Compagna aloa gh'é Zena!

D'acòrdio, semmo contenti de questo riconoscimento e pensemmo che sti inviti seggian 'n ònô e 'n inpegno a ese de longo prezenti dove Zena a se manifesta inte tutte e seu forme. Però l'é ciæo che pe poei onorâ tutti i inviti co-o parteçipâ a-e varie manifestaçoin bezeugna che i sòcci disponibili a dâ 'na man seggian de ciù. Veuggio dilo ciæo: quelli che son za ativi, fan fadiga a fâ de ciù de quello che fan. Se continuoemmo a ese solo 'na vintenn-a saiâ inposcibile fâ de l'atro.

Cosci piggio l'òcaxon da sciortîa de sto numero do Boletin pe invitâ tutti i sòcci che n'an coæ a fase avanti pe dâ 'na man ativa a-a Compagna. Fòscia a còsa ciù senplice da fâ a l'é quella d'anâ in sede, in ciassa da Pòsta Vegia 3/5 (ma aregodæve de telefonâ pe no trovâ a pòrta de legno), e parlâ con chi gh'é pe scrovî comme se peu dâ 'na man. E pe scrovî ascì che i sòcci da Compagna son 'na brancâ d'amixi che veuan ben a Zena e a Liguria!

Alegri!

